

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqaatinik saqqummiussivunga:

Naalakkersuisunut apeqqutit:

- 1. Danskisut aamma tuluttut sapinngisaqarnissamut piunasaqaataasut saniatigut ilinniarnissamut qinnuteqartunut kalaallisuinnaq oqaasilinnut sanasunngorniartutut ilinniarfimmi akuerineqarnissamut sanasutullu ilinniakkap naammassineqarnissaanut suut piunasaqaataappat?**
- 2. Ilinniagaqarnissamut qinnuteqartunut ataasiinnarmik (kalaallisut) oqaasilinnut sanasunngorniartutut ilinniarfimmi akuerineqarnissamut sanasutullu ilinniakkap naammassineqarnissaanut, kiisalu piunasaqaatinik allanik naammassinnissimasunut inatsisit suut Inatsisartunit allanngortinneqartariaqartussanut Naalakkersuisunit nalilerneqarpat?**
- 3. Suut tungavigalugit tuluttut aamma fysik/kemi-mik pisinnaasaqarnissaq sanasunngorniarluni ilinniagaqalernissamut piunasaqaataappat? Assersuutigalugu oqaatigineqarsinnaavoq sanasutut nalinginnaasutut ilinnialernissamut akuerisaanissamut Danmarkimi danskisut aamma matimatikimi 02 piunasaqaataapput¹.**
- 4. Kalaallit nunaanni inuusuttut ilaat ataasiinnarmik (kalaallitsut) oqaaseqarput. Suna tungavigalugu ilinniagaqarnissamut qinnuteqartut sanasutut ilinniarnissamut tiguneqassagunik kalaallit AAMMA danskisut pisinnaasaqarnissat pisariaqarpa?**
- 5. Danskisut aamma kalaallisut pisinnaasaqarnissamik piunasaqaat tassaasoq nalinginnaasumik atuarsinnaanermut allassinnaanermullu qulakkeerinninnerusoq, eqqortumik paasinninneruva?**

- 6. Kalaallisuinnaq oqaasillit KTI-mi sanasutut ilinniagaqarnissamut tiguneqartarnissaat kiisalu ilinniakkamik naammassisaqarnissaat qulakkeerniarlugu suliniuteqartoqareerpaa ?**
- 7. Ataasiinnarmik (kalaallisut) oqaasillit piumasaqaatinik naammassinnissimasut KTI-mi sanasutut ilinniarnissamut tiguneqartarnissaat kiisalu ilinniakkamik naammassisaqarnissaat qulakkeerneqassappat Naalakkersuisut qanoq akeqassanersoq naatsorsuutigaat?**

(Inatsisartunut ilaasortaq Anthon Frederiksen, Partii Naleraq)

Tunngavilersuutit:

Ilinniartitaanermi suliniutit Kalaallit Nunaata ineriartoqqinnissaanut tunngaviulluinnarput. Taamaattumillu pinngaaruteqarluinnarpoq nunatsinni kinguaavut kinguaassavullu immunnut iluaqusersornissaat kiisalu kalaallit nunaannut iluaqutaanissaat siunertarlugu ilinniagaqarnissaannik periarfissikkutsigit.

Kalaallit Nunaanni atorfissaqartitsineq aamma pisariaqartitsineq aallaavigalugu sanasutut ilinniarsimasut amigaataasarsimapput sulilu amigaataajuassallutik. Taamaattumillu ukiuni qulikkaani kingullerni suliffeqarfiiit nunanit allanit sanasunik atorfinitsitsisariaqartarput. Tamanna suliffeqarfinnut akisuvoq, taakkumi atorfinitsitsinermi immikkut aningaasartuuteqartarmata. Kisianni aamma kalaallit nunatsinnut tamanna akisuvoq tassami sanasut pineqartut aningaasat ilisimasallu nassarlugit nunatsinniit aallartarmata.

Tamakku tunngavigalugit inuusuttut aamma kalaallisuinnaq oqaasillit sanasutut ilinniagaqalernissamut aamma ilinniakkaminnik naammassisaqarnissaannut suut akorngutaanersut kiisalu akorngutissat pissusissamisunningsut piiarneqarnissaanut suut akorngutaanersut pillugit akissuteqarfigineqassasoq kissaatigaara.

Sanasumut ilinniarneq tassaavoq sulilluni ilinniagassaasoq aammalu timi atorlugu sulinermut ilinniarnissamut sammisuulluni. Taamaattumillu sanasutut ilinniarneq tassaasinnaavoq inuusuttunut atuagarsornermut inorsartunut imaluunniit timikkut assoroorartunut ilinniagaqarnissamut piukkunnartunut naleqquttoq.

Taamaattumillu ernumassutigaa sanaartorfiusuni sanasutut ilinniarsimanissamut naatsorsuutigineqartunut ilinniagaqarnissamut piumasaqaatit allanngortinneqanngippata inuusuttut kalaallisuinnaq oqaasillit ilinnialernissamut qinnuteqartunut suli pitsaannginnerusumik kingunerlussinnaasoq.

Qinnutigissavara apeqqutima ullut qulit ingerlaneranni akineqarnissaat.